

VERZELL DU DAS EM FÄHRIMAA



grindet 1975

FASNACHT 2012

BLAGGEDDE 2012



Mer dangge:

Drugg: Krebs AG	sit 37 Jahr drugge si die scheenschte Zeedel vo uns.
fir Gstaltig	Cybott
Inapa Schweiz AG	fir das tolle Babbbyr.
Grollimund AG	fir's scheene Binde.
Susy und Esthy	fir die fyne Pointe.
em Larvemacher	●
Schlegel Co AG	fir die bunte Steffli.
de Schnidere	Angela und Daniela, de Haut-Couture vo Basel.
Fötteli	em Schineblooser Benj
bsundere Dangg	em Fähriverein und em Fährimaa Urs

Druckerei




Krebs AG

Offset Buchdruck Verlag
seit 1734



**Dr Meeresgott vo de Röömer
Seit zu sich – kumm denn göömer
No Helvetie – däm ryyche Land
Deert erläbt men allerhand
Basilea haisst die Stadt am Rhyy
Deert soll's bsunders lessig syy
Wo me altgriechisch und Latin duet leere
Duet dr Neptun au aanegheere
Mit Sagg und Pagg zieht är do aane
Und kunnt grad richtig – nundefahne
Denn was z'Basel alles läuft
Wär verliert, wär gwünnt, sy Seel verkauft
Was d'Regierig schafft – oder au nit
Das griegt är alles hutnooch mit
Und will är das alles nit rächt glaube kaa
Verzellt är das em Fährimaa**



**Dr Neptun plantscht im Birsig umme
Duet drbyy e Liedli summe
Är gyggelet zum Wasser us
Und luegt diräggt ins neije-n-Affehuus
Lueg wie d'Schimppanse ummetoobe
D'Orang Utan sinn no bi de Schwoobe
Und d'Gorilla dien ehnder ummesitze
Zwischeduure im'ne andere schnäll eins pfitze
Knüüble d'Fricht us Baumstämm uuse
Oder dien in de Hängematte pfuuse
Wenn si denn erscht voruuse kenne
Und im Freie ummerenne
Denn gits in dä Zolli Lääbe
Und dr Neptun stoht drnäbe
Strahlt unseri Goma glügglig aa
«i verzell das schnäll em Fährimaa»**

Uff dr Basler Pfalz
Allne Lytte gfallts
So heisst's in «z'Basel an myym Rhyy»
Au dr Neptun mecht gärn deerte syy
Är flaniert vrbyy am Brunne
Gniesst und griesst die heerlig Sunne
Stoht an dr Buvette dr virtuelle
Grad nääbe dr Basler Wasser-Quelle
Goh't in Kryzgang, drnoo uff e Turm
luegt in Basler Regierigs-Sturm
es kömme glyy die näggschte Wahle
mir Basler lyyde wider rächti Quahle
Dr Gass dä goht, sunscht blybt alles bim alte
Au dr Morin mien mr no länger bhalte
Dr Neptun verzieht s'Gsicht und sait «Ohjee»
«Em Fährimaa verzell ich das persee»



D'Kasärne hett scho vyyl erläbt
Soldaate hänn do inne gläbt
Denn hänn Schieler do derfe leere
Und Monolog vo Leerer miesse heere
Im Pausehof hett me kenne spile
No Buebe oder Maitli schile
Moggedaig und Zuggerwatte
Git's an der Mäss uff deere Matte
Kunscht und Tattoo hänn ihre Plazz
d'Kasärne isch e glaine Schatz
jezz hett me kirzlig miesse heere
dass die Muure wurdi steere
freii Sicht will me uff e Rhyy
drum ryysst me die Muure-n-aifach yy
Dr Neptun luegt, glaubt nit rächt draa
Und verzellt das schnäll em Fährimaa





Im Haafebeggi zwai
Stoht dr Schorsch so ganz elai
Är singt zu syyn're Melodyy
E Schnitzelbangg – könnt's anderscht syy?
Är singt e Lied vom Blocher-Clan
Vo däm isch är jo gar kai Fan
Dä hett jo Stitz, es wird eim schlächt
Do kunnt die maroodi BAZ grad rächt
Är kauft die Zytig und git si witter
Drum goht's deere Zytig wyter schytter
Jetzt kunnt dr Suter no zem Zug
Dä kennt me no vom Crossair-Flug
Nimmt das Gäld vom Blocher Stöffel
Griegt vo de Basler hinder d'Leffel
Dr Neptun luegt en stuunend aa
Und verzellt das schnäll em Fahrmaa







**Grad gegenüber vom Schänzli
Macht dr Neptun e Freudedänzli
Är stoht im Joggeli am Spilfälrand
Hett e rotblaui Fahne in dr Hand
Dr FCB hett wider buzzt
Hett de Zircher d'Fliegel gstuzzt
Dr zwait Meischter-Tittel mit em Thorsten Fink
Aber dä hett sich denn mit eme Gingg
Verabschidet an d'Elbe zem HSV
Denn d'Bundesliga gfallt em au
Zem Glügg hett är is dr Vogel gloo
Hösch sinn mir do driber froh
Är fiehrt uns jetzt vo Siig zu Siig
Spilt allewyy! no in dr Championsleague
Dr Neptun luegt die nejscht Tabällen aa
Strahlt und verzellt das grad em Fährimaa**



**Dr Neptun stolziert dur unseri Stadt
Und findet's z'Basel schampar glatt
Die alte Hyyser voll Saage und Gschichte
Kennte uns e mänggs ko brichte
Aber plezzlig blybt är stoh
Und kaa die Wält gar nimm verstoh
Die Hochhyyser, wo unseri Stadtplaner plane
Die passe doch gar nit do aane**



**Glas und Stahl wärde s'Stadtbild prääge
Do inne hett's – weiss Gott – kai Sääge
Wär soll do inne schaffe und wär do wohne?
Fir wär dien sich so Baute lohne?
Muess Basel so in d'Hööchi schiesse
Kaa me's denn no z'Basel gniesse?
D'Planer, seit dr Neptun,
luege d'Stadt halt anderscht aa
Und verzellt das schnäll em Fährimaa**

Jetzt stoht dr Neptun uff dr Mittlere Brugg
Kunnt nimm vorwärts und au nimm zrug
Die vyyle Litt – was isch au los?
Und alli stehn si uff dr Strooss
D'Schugger laufen in ere Rajie
Iberall schmeggts no Faschtewaije
do pletzlich heert me Drummeldeen
Ueli kemme z'seggle – wie isch das scheen.
Vogel Gryff, dr Lej und au dr Wild Maa
schryyte vorus und hindedraa
Männer in schwarze Mäntel und Hiet
Voll Ehrfurcht aber strahlend, das stooht ene guet
S'ganz Glaibasel isch hitt uff de Bai
Am Glaibasler Ehredaag blybsch nit dehai
Majestetisch stoht dr Neptun vorndedraa
Und verzellt denn das em Fährimaa





**Oh liebe Philipp Hildebrand
Dy Frau entfacht e wilde Brand
Verschiebt schnäll e paar US Doller
Das hört dr Blocher, griegt e Koller
Verrätscht dr Hildebrand – dä arm
An d'Calmy-Rey diräggt – briedwarm
Und will au d'Präss heert vo däm Firzli
Gits an dr Börse grad e Stirzli
Aber jezz erscht wird's so richtig glatt
Mäldet s'rote Buechstaabe-Blatt
Do mischlet d SVP so richtig mit
Me frogt sich scho, was das no git
Wär nimmt als näggschte ächt dr Huet?
Gäll, Christoph Blocher – das bruucht no Muet
Und dr Neptun hebt sich dr Buuch vor lache
Hösch Fährimaa – die verzelle Sache!**

LACHS MIT FRISCHE SPARSE

Me bruucht fir vier Persone:

- 2 Kilo wyysi Sparse
- 500 g Wildlachs
- 2 Bund Friehtligszibeli
- 1 Knoblauchzeeche
- 50 g Angge
- $\frac{1}{2}$ Bächer Rahm
- 2 Gleesli droggene Champagner
- 1 Zitrone
- Zugger, Salz, Päffer

1. Sparse schelle, e Pfanne mit Wasser uffsezze, Salz, bizz Zugger, Zitronesaft und e Stiggli Angge dryy, d Sparse dinn waichkoche.
2. Dr Lachs in Straife schnyyde mit Zitronesaft mariniere. Friehtligszibeli und Knoblauch glai schnyyde, im Angge aaschwizze. d'Lachsstraife drzuegää und mit aabrööttele, mit eme Gleesli Champagner ablösche, s'zwaite Gleesli duet me dringge. Drnoo duet me dr Rahm draa und mit Salz und Päffer us dr Mühli wirze.
3. D'Sparse uff em Däller aarichte, Lachsstraife mit däm feine Champagner-Rahm-Sössli drierber verdaile und frische Peterli oder Dill drierberstreue. Drzue passe feini neiji Händöpfeli.





**Fährimaa – Fährimaa, wo das Schiffli styyre kaa
Fährimaa, hösch Fährimaa – jo di mecht i syy**

**z'Basel macht me Fasnacht
das wissen alli Lytt
drumm sinn mir Schineblooser
jezz do und mache mit
mir hänn e tolle Waage
und Gostyym gfalle-n-au
au dr Zeedel isch is glunge
mir stählen allne d'Schau**

**Fährimaa – Fährimaa, wo das Schiffli styyre kaa
Fährimaa, hösch Fährimaa – jo di mecht i syy**

**Drum dien mir Fasnacht mache
Sinn in dr ganze Stadt
Hänn immer ebbis z'lache
Und hännns ganz aifach glatt
Mir sinn d'Schineblooser
Und singen unser Lied
Mir dien uns sälber fyre
Und wärde-n-au nit mied**

**Fährimaa – Fährimaa, wo das Schiffli styyre kaa
Fährimaa, hösch Fährimaa – jo di mecht i syy**

**Mir sinn d'Schineblooser
Und haue's jezz uff d'Walz
Mir singe no die Strophe
Und hoffe allne gfallt's
mir gsehn is wider s'näggscht Johr
glyche-n-Ort und glyychi Zyt
mir saage «Sali zämme!»
Blyybet gsund und blyybet fyt**

**Fährimaa – Fährimaa, wo das Schiffli styyre kaa
Fährimaa, hösch Fährimaa – jo di mecht i syy**



grindet 1975



**Das isch s'Fasnachtsheftli Nr. 5
Nr. 6 erschynt am 18. Hoornig 2013**